

江蘇省立蘇州圖書館
吳中文獻小叢書之十九

畏壘山人文集

序

鄉先賢徐大臨先生昂發，自號畏壘山人，康熙庚辰舉進士，由庶吉士授編修，甲午充福建鄉試副考官，庚子提督江西學政。居恆文酒自豪，堂傾四座，宮詞百首，徧播旗亭酒社間。其詩刻峭清新，有透空碎遠之音；筆記則長於考證，亦見博洽。同時談藝名士，無與儔者。詩集筆記，早見四庫著錄，縣志藝文欄亦載有畏壘筆記四卷，畏壘山人詩集四卷，宮詞及乙未亭詩集六卷，獨於其文集未見著錄。是集凡四卷，集中所載如三山林氏尙書集解敍錄，刻三種孝經總序，以及周行說，麟趾騶虞說等篇，皆爲考證之文，於書評諸家之說，謂「蘇氏傷於簡，林氏傷於繁，王氏傷於鑿，呂氏傷於巧，一言之中肯於詩，舉周行及麟趾騶虞之說，博引各家之義，加以折衷於孝經，則序錄司馬氏、范氏、吳氏、董氏之說，俾好古者知所審擇。他如平北頌，顧節母吳太孺人旌門頌等篇，均係駢

體，典麗喬皇，追倣六朝。又若爲諸家所撰詩文集序，或其書已佚，則於先生之文，亦可窺見其梗概焉。是集本爲虞山鵠峯草堂周氏所珍藏，默齋陳先生，博雅好古，轉輾繕鈔，貽藏本館，俾廣流傳。茲特爲付鉛槧，以遺來者。民國二十九年九月江蘇省立蘇州圖書館編纂委員會識。

畏壘山人文集

長洲 徐 昂發 大臨

吉安王氏讀書管見跋錄

嗟乎。尙書出秦火燬燼之餘。伏生以耄耄之年。掇拾殘缺。廬有存者。乃初亂於河內女子之秦誓。再亂於張霸之僞古文。三亂於枚瓚二十五篇之書。及姚方興、錙、光伯之增益。而卒沉錮於孔穎達之正義。以晉世晚出之書。定爲科律。舉馬、鄭、王、賈諸專家之學盡罷斥之。嗚呼。此亦書之厄也。有宋諸儒嘗疑之。朱子亦以大序文字不類西漢。與孔叢子同是僞書。且云。豈有數百年壁中之物。不訛捐一字者。嗣後王魯齋、吳艸廬輩。盡銳攻之。於是學者稍稍知古文之謬。然九峯蔡氏之於書。始爲朱子之嫡嗣。其所爲書傳。於古文初無異議。學者愛護舊聞。不敢別自表幟。信者什七八。疑者什三四而已。元與耕王氏。其爲學最長於書。著讀書管見二卷。蓋攷訂蔡傳而自發明其所學。具論禹謨一篇。出於孔壁。雜亂無序。征苗之事。又與舜典、皋陶謨相牴牾。大田說命、蔡仲等篇。其文辭嘗相出入。蓋古文書出一手。故其言往往拖沓。衛宏謂伏生書。晁錯以意屬讀而成。此特左袒古文。殊不足信。至於蔡傳得失。亦時時有所駁正。其言既簡敏。纘嚴。專議論復與魯齋、艸廬合。由此益信朱子之言。蓋有特見。學者誠由是以尋省伏生之書。得以稍見唐虞史錄之遺說。而不惑於故常。則可謂善讀書者已。與耕名充耘。以書舉進士第。與其充耘弟篤志經

學。蓋吉安之老儒長德也。

三山林氏尙書集解敍錄

尙書集解。宋宗正丞林少穎輯。朱子嘗稱之。但謂自洛誥後非其所解。按林畊敍云。先拙齋書成時。門人東萊呂伯恭取以歸。諸生傳寫。十無二三。倉卒鉅梓。絕多舛僞。畊父縣丞君。苦志訪求不獲。後畊得余氏刊本。及葉氏家藏本。會粹攷訂。而後是書復完。審觀其言。豈朱子所見之書。乃鉅梓時未暇參訂者耶。抑伯恭所藏之本。朱子絕未及見耶。朱子有言曰。尙書須識二帝三王之心。而通其所可通。無強通其所難通。諸家之說。如蘇氏傷於簡。林氏傷於繁。王氏傷於鑿。呂氏傷於巧。要其間皆有所長。余觀少穎之書。迴翔曲折。善於往復。使讀之者循循乎其辭。可以達於聖人之道。其說雖繁。然所稱誨人不倦者非耶。少穎弱冠事呂文清。傳伊洛之學。其說粹然。一出於正。呂伯恭少學於少穎。得其指授。及講道金華。輯尙書說。不過舉少穎成解。條暢言之。蓋麗澤師友之淵源。實在乎是。其書信可寶而重也。初洪景廬爲三山教。少穎爲書學。論講帝釐下土數語曰。知之爲知之。二典所以可言。不知爲不知。九共稟飫略之可也。景廬擊節稱善。由此論之。非卽朱子通其所可通。無強其所難通之說歟。其亦真深於書者已。畊字耕叟。淳祐元年徐儼夫榜進士。父將樂丞子冲。字叔詹。紹熙四年陳亮榜進士。卽拙齋從子也。是書朱氏授經圖爲五十八卷。畊所校刻止四十卷。今缺第三十四卷。存者三十九卷。

會稽胡氏定正洪範敘錄

尙書一書。羣相聚認。莫相統一。然其所疑。止枚賸古文。於洪範未嘗有所置議也。自蘇氏、葉氏、張氏、洪氏以王省惟歲而下。當在五紀之下。因疑此篇有錯簡。嗣是會之王氏、本心文氏、幼清吳氏。各有攷正洪範定本。然亦人自爲說。互有得失。會稽胡氏文集三家之長。作定正洪範一編。繫以集說。又前爲定正洪範之圖。凡三十有六。蓋采延平徐氏之說。以爲河圖洛書。皆出上古。密幟則之以作易。大禹則之以作範。而定九數爲河圖。十數爲洛書。以正啓蒙之誤。其說可謂備矣。然予攷毛誼父之言。謂劉牧之從范諤昌傳希夷之學。特紊亂圖書。錯互言之。以祕其術。易本義啓蒙已正定十爲圖九爲書。而朱子之門人。於他文字容尙有未刊正者。後儒慎勿反執牧之之舊說。以相淆惑。而蔡季通亦以關邵之學。皆以十爲圖九爲書。牧之之易置圖書。殊無左驗。由斯觀之。允文所引之說。其果盡然耶。先儒謂九疇中五行。乃論切於民用之五材。儒者不察。難以緯候之學。遂以皇極稽疑庶徵福極。與五行相牽合。此漢儒傳會之說。而後人祖述之咎也。昭武黃元鎮有云。洪範者。述治天下之大法。有此九類。與所謂九前一後三左七右四前左二前右八後左六後右者。絕無相配之法。近世歸熙甫亦云。易之道甚明。而儒者以河圖亂之。洪範之義甚明。而儒者以洛書亂之。二者吾取以爲折衷可也。至於釐正舛譌。發明奧義。則此書信會之、本心、幼清之功臣矣。允文名一中。以進士補紹興路錄事。所著經學。自定正洪範外。又有四書集箋。今佚。不可攷云。

刻三種孝經總序

孝經一篇十八章。河間顏芝所藏。孝經古文一篇二十二章。孔壁所藏。與尚書同出。劉向典校。經籍以十八章爲定。而古文遂廢。隋劉炫取今文孝經。離析增衍。復爲二十二章。當時皆指爲炫自作。非孔氏舊文。唐開元中。詔羣臣集議。史官繒子玄請行繒炫本。博士司馬貞駁之。謂古文放失已久。近儒穿鑿更改。及僞作閨門一章。文句凡鄙不足信。天子從其議。於是別取王肅。繒劭。虞翻諸家之說爲之注。而古文復廢。宋司馬迂叟。篤信古文。作指解一卷。范淳夫亦重之。作說一卷。表上於朝。於是古文稍復顯。至朱子會粹羣言。攷論同異。以孝經惟篇首六七章爲本經。乃取古今文合其離析。去其增衍。作孝經刊誤。而閨門一章仍其舊。熊勿軒序鄱陽董氏孝經。謂司馬貞淺學陋識。貶閨門一章爲僞書。而黜古文。卒啓明皇帝無禮無度之禍。其論蓋本諸此。元臨川艸廬吳氏。獨因朱子刊誤。重加釐正。而刪閨門一章。期合乎朱子去所當去。存所當存之義。亦卓然成一家學。予因序之曰。嗟夫。孔氏壁所藏古文孝經。予不可得而考矣。至顏芝本一篇十八章。一千七百九十九言。梁皇侃第其章次。唐明皇帝校注御札。刻石太學。世所號石臺孝經是也。古文二十二章。出自繒炫。凡一千八百一十言。則司馬公爲之解。范氏爲之說。朱子作刊誤。定經一章。傳十四章。總一千七百八十言。鄱陽董氏釋之。艸廬吳氏更定經一章。傳十二章。一千五百八十二言。其文頗與朱子異。石臺孝經。世多有其書。若司馬氏。范氏。吳氏。董氏之說。學者或未及遍觀。余序而

錄之。使好古者審擇焉。

陸氏經典釋文序錄

唐陸德明音訓易書詩三傳。孝經論語三禮。及老莊爾雅。著經典釋文總三十卷。夫音訓之學難矣。儒者既言人人殊。而漢儒之於經文。輒有所改易。加以五方殊俗。土音不同。則訓詁隨異。鄭康成齊人多齊音。熊安生朔人多北音。許叔重讀血爲猛。劉昌宗以承音乘。紛紜膠轕。不可窮詰。而又此是彼非。出奴入主。雖頡頏復生。終莫得而定也。德明此書。廣采諸家。取材甚博。然魏鶴山嘗疑之。謂德明與孔穎達並時。乃釋文與正義多所背馳。熊天慵謂德明之學。雖唐人亦未盡信。釋文一書。殊失古音變動不居之意。或又謂德明吳人多用吳音。與中州殊。不足盡律六經之言。凡所以駁之者如此。夫古文字少。率多假借。平仄皆通用。後人強增偏傍點畫。別出一字。以俗亂雅。又自反切聲韻之學興。其說駢枝衍複。根延蔓引。用今變古。於是正音始盡廢。然其失自王肅。呂忱。郭璞。孫炎。顧野王。陸法言之徒皆然。不獨德明也。漢世授經。皆家奉一師。人尊一說。即以許氏說文觀之。如既伯既禱。爲既禱既稠。褻裘爲詒之。芟夷爲夸夷之類。其學最爲近古。至穎達作正義。始廢漢魏以來專門之學。有識者常痛悼之。此不足爲德明病也。先儒謂或譏德明多收吳音。其實不然。觀釋文一書。必字具數音。解具數義。異同並陳。使學者自擇。雖其以萬事墮哉。作許親切。百兩御之。音作迓之類。及注釋儀禮。頗有疎略。皆不免後儒譏議。然自漢以來。諸老儒之

殘緒。賴是得以稍稍窺見其百一。學者當愛護而謹守之。慎無輕信宋元諸儒吹癢索疵之論。而廢黜之也。至其以老莊之書與羣經並列。正如設鱗雲樹崇牙。下管象武。金奏遏樊渠。而忽難以誅師之舞。鞞襲氏之樂。不無亂正。讀者用以博異聞可也。

山陰傅氏夏小正戴氏傳注序

宋傅子駿注夏小正戴氏傳四卷。其自序云。其書初得於外兄關澮所。合傳爲一卷。不著作者名氏。繼攷集賢所藏大戴禮版本。始知傳爲戴德撰。傳舊有注。因增而廣之。釐爲十二篇。按朱子儀禮集傳。論次夏小正篇。退傳於後。而獨存正文。儀禮傳乃朱子晚歲所親定。嘗謂恨不令韓文公見之。其黜傳必有特見。豫章熊氏。謂呂氏月令。其言稍完。小正則定非全書。其句下添文解釋。辭旨不古。殆東漢以後儒者所爲。夾漈鄭氏。謂戴德撰夏小正一卷。全類月令。然不如月令之密。馬融舍此取彼。最爲精別。夫熊氏但疑傳非西漢人所能作。鄭氏則并疑小正非眞夏書。合二家之說論之。殆小正爲德所自撰。而傳又別出一手。其以傳爲出於德者。殆未盡然歟。雖然。漢儒從秦火之後。緝殘補壞。往往古時制度文物。賴以傳於後世。小正一書。未必非夏時朽編蠹策塵存之一二。學者當尊信朱子之說。慎無安其所習。毀所不見。而忘多聞闕疑之義。如班固所譏也。子駿名崧卿。山陰人。省試第一擢甲科。高宗朝累官浙東防遏使。進給事中。罷崧卒。是書成於宣和辛丑。當是其少作云。

主靜丘人極論

易大傳稱三極之道。朱子謂三極天地人之至理。三才各一太極。其說尙矣。愚以謂天高地下。萬物散殊。惟聖人爲能財成天地之道。輔相天地之宜。以左右民人。極立而三極俱立。是故立人極爲難。濂溪周子以謂主靜立人極。微哉斯言。請論之。樂記云。人生而靜。天之性也。感物而動。性之欲也。物至知知。好惡形焉。好惡無節於內。知誘於外。欲動情勝。遠離性初。而人極喪矣。聖人定以中正仁義。所謂中正仁義者。五常之德也。五行之理也。無極之眞。二五之精。皆本於靜。故曰主靜也。今夫九州異國。山澤異俗。百物異宜。嗜欲相奪。情僞相攻。各爭其所。我苟無主於內。將以御事物之至變。徒見其回惑。矜亂而已矣。惟聖人能見天下之蹟而象其物。宜見天下之動而觀其會。通行其典禮。故曰至蹟而不可惡。至動而不可亂。夫其所以能見天下之動且蹟者。主靜故也。夫喜怒哀樂之未發。太初太一不可得而名。然而孕育萬有。函負兩儀。微獨己性。凡人物之性。天地之性。皆具於此。能於此長惺長覺。則三極之道皆備於我。聖人所以見天下之動且蹟者。正在斯時。所謂寂然不動。感而遂通天下之故也。觀於天地之化育。春。蠢也。產萬物者也。夏。假也。長萬物者也。秋之爲言。擎。擎以時察。冬之爲言。中也。藏也。自十月純陰。而後霜雪凝閉。百蟲蟄伏。艸木枯僵。然而春夏之發生。長養。皆於是始牙。故程子曰。乾。陽也。其靜也專。其動也直。不專一。則不能直。遂。坤。陰也。其靜也翕。其動也闢。不翕聚。則不能發散。一動一靜。互爲其根。然不靜則不能動。故靜又爲

之根動。聖人主之。以全人生。而靜之性。而見天下之動且蹟者於此焉。在此人極所由立也。大傳又謂。闔戶謂之坤。闔戶謂之乾。朱子以爲先言坤者。由靜而動也。山下出泉爲蒙。蒙者物之穉。長養之基。而成言乎艮。乃萬物之所成終而所成始。皆主靜之說也。孟子之言夜氣。程子之言主敬。周子之主靜。其此物此志也夫。

周行說上

卷耳之詩。諸儒之說詳矣。謂后妃憂在求賢。而不在於采卷耳。此荀卿之說也。謂思佐君子官賢人。置之列位。又念臣下勤勞兵役。君當與之饗燕飲酒。以釋己之憂思。此毛鄭之說也。謂后妃以采卷耳之不盈。知求賢之難得。因物托意。諷其君子以愛惜賢才。而宴犒其勤苦。此歐陽子之說也。朱子退黜小序。謂是詩爲思念其君子。故方采卷耳而置之道旁。欲升高望遠。酌酒以自解其憂傷。此詩集傳之說也。夫國君不能官人列於位。又不知臣下之勤勞。闕宴勞之常禮。重貽后妃憂。則文王之志荒矣。歐陽子駁之如此。其自立說。主於微言托諷。以見周南君后皆賢。其宮中相語者如是。非有私謁之言也。至朱子直謂后妃思念君子之作。與艸蟲詩意略同。則與毛鄭之說迥異矣。愚按子夏之詩。五傳而至荀卿。卿六傳而至大毛公。故毛鄭之說。猶荀卿之說也。夫六經遭秦火之餘。率皆傷殘毀裂。不可綴補。卽師說相傳。亦未必無闕壞。朱子掇去小序之說。獨表明遺經於晦蝕殘毀之中。可謂偉矣。然而秦漢以來之緒言。疑終不可盡

廢也。愚嘗攷朱子答劉坪書云。昨聽兒輩誦詩。偶得此義。當於疑義簿上錄之。其說謂一章言后妃志於求賢審官。又知臣下之勤勞。故采卷耳備酒漿。然及其有懷。則置之周行之道。憂之切也。二三章皆臣下勤勞之甚。思欲酌酒以自解之辭。其說與歐陽子相上下。而仍不廢毛鄭之說。愚敢取以折衷卷耳之義。

周行說下

詩言周行者三卷耳。鹿鳴。大東是也。毛鄭之說曰。行。到也。思君子官賢人置周之列位。箋云。周之列位。謂朝廷臣也。其於鹿鳴。大東皆然。朱子釋卷耳。謂周行大道也。又云。卷耳大東。道路之道。鹿鳴道義之道。愚按歐陽子鹿鳴本義。其說周行。略主鄭氏。而於大東則云。譚人抒袖皆空。至於窮乏。其公子佻佻然奔走於周行。其說與朱子同。而於卷耳闕其義。止義引左氏襄十五年傳。君子謂楚於是乎能官人。詩云。嗟我懷人。寘彼周行。能官人也。王及公侯伯子男甸采衛大夫各居其列。所謂周行也。余意毛鄭之說。蓋取諸此。張子云。置心平易始知詩。詩集傳謂后妃貞靜專一。或當文王朝會征伐之時。與羨里拘幽之日。憂傷思念。故方采卷耳。而旋置之道旁。可謂平易矣。然而周行之說。左氏引之。毛鄭述之。亦學者所宜盡心也。愚又攷鄉飲酒及鄉射禮合樂。周南關雎。葛覃。卷耳。召南鵲巢。采芣采蘋。謂之房中之樂。皆述后妃夫人之德。與其克修婦職。執志憂勤。爲王政之本。然則思君子官賢人。置之列位。其真后妃之志也歟。

麟趾騶虞說

歐陽公稱孟子去詩世近。而最善言詩。其所說詩與序意多同。後儒異說爲詩害者。賴序文以爲證。然序於二南多失。而麟趾騶虞所失尤甚。朱子作詩集傳。往往排黜詩序。而二詩獨取其說。愚因折衷而論之。夫詩序未爲失。而鄭氏之說。則未爲得也。序以麟趾爲關雎之應。騶虞爲鵲巢之應。蓋謂德盛行。致公子信厚似麟。國君仁心如騶虞耳。鄭氏乃謂關雎之詩。以麟爲應。而以鵲巢之應爲應。德自遠而至。此歐公所謂講師汨以己說者也。然而歐公之說麟趾也。以謂仁獸無鬪害之心。尙以蹄角自衛。國君以仁德爲國。猶須公族相輔。此乃比於衆建親親之義。而其說騶虞。則謂首言田獵之得時。次言君仁而不盡殺。卒歎虞人之得禮。夫騶虞之虞官。駕田豕。以待君之射。乃其常職。何有於得禮。而反覆詠歎之乎。恐詩人之旨。未必盡然也。顧序云。衰世公子。皆信厚如麟趾之詩。將如南軒張氏。謂周之公子耶。則不應繫之衰世。將如逸齋補傳。謂商之公子耶。則與詩竟不類。其不及朱子之說審矣。然詩集傳以一發五紕。爲中必疊雙。以斯見庶類之殖。舍矢之能。似固然無足辨。然合於所謂仁心自然。不由勉強之義。或未免閼隔而不屬。是仍不如毛鄭之說之爲長也。愚嘗錯觀衆說。如朱子所說麟趾。最爲諦當。至騶虞一詩。齊詩章句。謂騶虞天子掌鳥獸之官。逸齋補傳引賈誼新書。謂騶虞者。文王之囿。虞者囿之司獸。如山虞澤虞之類。張銑註。魏都賦。梁騶古天子田獵地名。爾雅釋獸。亦無騶虞。而載記射義。天子以騶虞爲節樂官。備也。鄭志云。備者取其一發五紕。言多賢也。雖引詩斷章。然與所說召南。又別爲一義。未敢臆斷。當俟博識者

平北頌并序

臣某謹言。恭惟皇帝陛下。誕膺成命。恢纂鴻休。如天之壽。如地之載。奮仁爲雨露。鼓義爲雷霆。自埽滇黔。定甌粵。收臺灣。金鼓所震。萬方畢臣。遠至區外數千里。俄羅斯。喀爾喀等諸部。皆稭穎請吏。歸命恐後。邇無不協。遠無不賓。四海大和。庶物咸若。獨厄魯特。噶爾旦。恃其險遠。擾我邊陲。侵我外藩。誘我服屬。我皇上天地爲心。山潭含垢。屢申詔旨。許之自新。而兇醜披猖。怙終不復。亭障不得息烽。邊氓不得耕耨。勞擾搶攘。害及萬姓。我皇上赫然震怒。親總六師。輕武千乘。驍騎百萬。逼賊於克魯倫河之地。斬其闕支。翦其種落。賊衆潰北。鳥散獸竄。逃死窮磧。皇上知其未有倭心。分命將帥。嚴兵圍蹙。於是奔突勢蹙。乞援路窮。皇上復於冬月蒞邊。指揮軍旅。授以方略。仍諭厄魯特所部以朝廷威德。先後來歸者。襁負於道。還治兵雲中。須春乃進。及師期。駕發京師。至於五涼。諸軍畢會。七萃之夫。五校之士。拔距爭奮。超乘俱起。皇上乃執鼓誓師。勒以三乘。厲以威神。遂踰絕塞。度大漠。耀兵於狼居胥山。焚頭曼之戎帳。執休屠之愛子。雷砰電耀。萬里風披。噶爾旦同惡外殄。腹心內訐。迄用天殛。自殄荒谷。餘種悉降。北邊大定。惟我皇上。以至德格天。以至仁及物。憂堯之心。勞禹之形。決聖武於獨斷。播神威於沙朔。三黎虜庭。埽除兇孽。從巢山駕海之羣。皮服引弓之長。皆編名屬國。陳貢鴻臚。鑄劍戟爲農器。納兆民於仁壽。中外禔福。寔寓熙然。日月四時。罔不順序。文德武功之盛。推較千古。無有與二。小臣不文。謹作頌三篇。以紀休烈。

成命

天子自將北伐。初出塞。集大功也。

皇受成命。惠此萬方。我詒黍稷。我時雨暘。維山乃棧。維水乃航。寄鞮象譯。罔或不王。其一彼狂不順。敢盜我邊。聚頑嘯兇。蜂疾蟻延。帝命惠來。文告往先。彼狂卒迷。乃絕於天。其二皇奮厥武。大常建羽。以類以禡。帥我罷虎。皇誓於師。親執路鼓。鳴錫振鐸。繕我士怒。其三皇命虎臣。出車於西。乃翼乃角。乃鏃乃撓。王猶允塞。衽席過師。穀我矢弧。以射妖蜮。其四王旅嘽嘽。踰彼砂磧。小大頓顙。蕃幾來格。有艸斯甘。有泉斯溢。士飽而歌。同仇是索。其五王旅嘽嘽。如川如獄。進次於河。拔其距角。千夫一勇。是韞是椽。血馘以靈。皇功維濯。其六兇徒既訏。拉如披枝。竄於窮野。遷我西師。會茅重弓。咒甲虎旂。載踣載趾。載剗載剗。其七師於之武。神謀丕奠。萬里風披。有征無戰。龍荒狼望。眎我幾甸。仰父俯子。式歌以譏。其八聖謨廣淵。朔庭遂空。邊氓燕喜。上帝錫祉。麻麥穰穰。禾黍芃芃。億萬斯年。維天子功。其九

成命九章章八句

皇祐

天子紓民困。再出塞也。

皇祐下民。亦既勞止。顧茲兇醜。窮荒作瘠。旣翦旣蹙。靡覺靡悔。震霆殷天。撮處塞耳。其一鳥獸之伏。越有

噬攫。顧彼兇醜。其跽或躍。皇命虎臣。整我疆索。敬修我戎。張皇武略。其二爰峻爰守。爰徧爰誘。地紘旣張。天畢斯覆。王言炎炎。先迷予宥。孰是赤子。絕於父母。其三皇有正命。往巡於邊。旛旐央央。檀車連連。朔風觸發。澤腹旣堅。惠是黎庶。迺泄迺前。其四左蠡旂旆。和鸞噦噦。皇於修戎。於塞之外。振我天策。滅此狡獪。邊氓歌舞。繫皇之賴。其五兇醜駝矣。且顛而僵。游魂或變。視我糗糧。王師奮擊。乾坤雷硠。爲獍爲鴞。往作爾殃。其六其殃孔亟。部攜族淪。左蠡右賢。鳥伏獸躡。疎命於皇。旣悔旣悛。皇曰爾來。爾維我人。其七天子曰嗟。予其休士。還軍於代。代人咸喜。或學或鼓。於塗於市。髦倪駢衡。媚於天子。其八臘月維吉。皇乃還歸。父老稽首。願留毋遠。皇用勤民。服是戎衣。外靖內安。維德之威。其九

皇祐九章章八句。

天監

天子三出塞。至狼居胥。兇醜窮蹙。服天誅也。

天監有赫。翳德是新。維皇翼翼。至誠感神。蠢爾小醜。敢梗不馴。皇三震之。鼗鼓金鐸。其一維皇勤民。於山於川。匪徼匪棘。天討是虔。毋縱寇虐。以靖我邊。武車綏旌。陟降連連。其二皇泄於涼。格我多士。桓桓多士。維天子使。我徒我車。我行孔舒。蕩其穹廬。至於狼居。其三維狼居胥。朔野之極。皇親蒞止。舜禹是則。摯寶請臣。徧於蕃國。豈伊武功。上帝與德。其四彼兇有子。乃廢乃俘。彼兇有臣。莫究莫圖。震我師武。戎兵是祛。

震我德音。腹心是輸。其五。天地大矣。彼兇罔匿。自殘自戕。伏天之殛。蠢蠢餘醜。心與面革。蠻夷蕃鎮。遑敢作慝。其六。迺諭迺拊。載歌載舞。北荒卽序。允皇之武。皇武既張。皇風既揚。區外萬里。我階我堂。其七。皇乃振旅。至於京師。獻社告學。於廟受釐。櫜弓衅甲。文德是施。文德是施。萬邦洽熙。其八。皇勤於民。弗皇啓處。殄此兇醜。邊患是紆。上帝眷之。富以麥黍。惠我萬邦。既壽永昌。其九。

天監九章章八句。

皇帝駐驛狼居胥山頌并序

臣聞德之盛者。無遠弗届。天之廢者。雖衆必亡。古今同符。詩書具載。恭惟皇帝陛下。道承三統。政式九圉。澤潤江河。光照日月。雨露合其仁。雷霆配其義。以慈惠爲甲冑。以忠信爲干櫓。故能內平三孽。外擴臺灣。北收俄羅斯。喀爾喀諸部。威德所馳。罔不臣服。凡有血氣。並戴尊親。獨厄魯特。噶爾旦。梟獍其形。豺狼其性。敢違聲教。肆逆搆兇。侵擾我外藩。憑陵我邊鄙。我皇上天覆地載。包含蠕動。屢頒告讓。曲賜矜全。而賊阻衆介險。執迷不復。皇上念邊氓之震驚。亭戍之勞勩。獨施睿算。親總六師。激震雷以破山。鼓威風以蕩海。於是有克魯倫。昭木多之捷。賊斬刈之餘。死亡相枕。顧乃不思歸命。尙竄窮荒。我皇上深燭兵機。洞知賊勢。乘彼魚爛釜糜之會。用我侮亡取亂之師。嚴冬朔月。再浹塞垣。分命諸將。嚴兵圍蹙。賊黨慄威懷德。先後來歸者。相望於道。遂治兵雲中。簡甲蒐乘。以待春期。今茲二月。駕巡涼州。諸軍畢會。鷹揚之校。熊虎